

Holi Spirit Em i diposit bilong olgeta samting Krai i bin kisim bilong yumi na bihain yumi bai lukim.

Efesus 1:14

Long planti wik yumi bin skelim **Efesus 1:1-13**. Na fes samting aposel Pol i tokim yumi i olsem, em i tok, "Mi salim dispela tok long yupela, ol manmeri bilong God – mi salim dispela tok long yupela manmeri i bihainim tru Krai Jisas." (Lukim **lain 1-2**) Olsem na, yumi klia olsem, olgeta toktok God i mekim long dispela buk Efesus em bilong manmeri i bihainim tru Krai Jisas, em bilong mipela i bihainim tru Krai Jisas. Dispela tok long buk Efesus em i no bilong olgeta manmeri. Nogat. Em bilong mipela i bihainim tru Krai Jisas. Em bilong yumi i bilipim na trastim feifful wok bilong Jisas na i bihainim Em.

Na Pol i bin tok wanem long **lain 1-13**? Yumi skelim na holim tingting.....

- God i givim olgeta blesim bilong heven long yumi i bilong Krai. Olgeta blesim bilong heven em bilong yu na mi i bihainim tru Krai Jisas. (Lukim **lain 3**)
- Long bipo, taim dispela graun i no kamap yet, God i bin makim na pikim yumi na Em i pasim yumi long Krai. God yet i bin pasim yumi long Krai, na long dispela as tasol nau yumi bilipim na trastim na yumi bihainim tru Krai Jisas. (Lukim **lain 4**)
- Na long wanem as God i bin makim na pikim na pasim yumi long Krai? Em i makim na pikim na pasim yumi long Krai bai Krai i mekim wok long diwai kros bilong mekim yumi holi na i no gat asua long ai bilong God. Yumi sin manmeri na God i bin pasim yumi long Krai bikos Krai tasol i ken i mekim yumi holi na i no gat asua long ai bilong God. (Lukim **lain 4 na 7-8**)
- Pol i tok, Krai i bin mekim wok long diwai kros bilong baim pe bilong sin bilong yumi – bilong baimaut na pinisim pe bilong sin bilong yumi. Long dispela as, nau God i save fogivim yumi long sin bilong yumi. Wok bilong Krai long diwai kros i mekim yumi holi na i no gat asua long ai bilong God. (Lukim **lain 7-8 na 4**)
- God i bin mekim ol dispela wok bikos Em i laik adoptim yumi na mekim yumi pikinini bilong Em long femili bilong Em. Em i bin makim na pikim yumi bilong adoptim yumi na mekim yumi femili bilong Em. (Lukim **lain 5-6**)
- Na wantaim ol dispela samting, God i givim trupela save na tingting long yumi. Long wanem? Em i givim trupela save na tingting long yumi bai yumi klia long ol dispela samting God i bin mekim na bai yumi tanim bel na bilipim na trastim na lavim na bihainim Em. Holi Spirit bilong God i bin opim ai na ia na bel bilong yumi bai yumi ken i save long ol dispela samting God i bin mekim na bai yumi tanim bel na bilipim na trastim na lavim na bihainim Krai. (Lukim **lain 7-8**)

- Na tu, God i bin soim yumi plen bilong Em. Na plen bilong God i olsem, God bai bungim olgeta samting bilong heven wantaim ol samting bilong dispela graun na Em bai kamapim wanpela nupela samting. God Em i wok long kamapim wanpela nupela komyuniti we olgeta manmeri bilong dispela nupela komyuniti wantaim olgeta samting bai i stap aninit tru long wanpela trupela hetman, Jisas Krai. (Lukim **lain 9-10**)
- Na nem bilong dispela nupela komyuniti God i wok long kamapim em i sios. Dispela nupela komyuniti God i wok long kamapim *nau*, na *bihain* Em bai bungim, em i sios bilong God. (Lukim **lain 5**, na tu, yu ken i lukim **1 Timoti 3: 15**)
- Na husat i stap insait long dispela nupela komyuniti bilong God? Yumi. Yumi God i bin makim na pasim long Krai. God i bin makim na pikim ol wanwan manmeri na Em i pasim ol long Krai bilong kamapim dispela nupela komyuniti bilong Em, bilong kamapim sios bilong God. (Lukim **lain 11-13**)
- Na dispela nupela komyuniti i stap, sios i stap, bilong apim nem bilong God i bikpela na gutpela tumas. God i mekim ol dispela wok bilong kamapim wanpela nupela komyuniti we olgeta manmeri bilong dispela nupela komyuniti bai i stap aninit tru long Krai na ol bai amamas tru na litimapim tru nem bilong God na nem bilong Jisas Krai wantaim. (Lukim **lain 6 na 12 na 14**)

Na hau na bai yumi save, yumi stap long ol dispela samting o nogat? Hau na bai yumi save, God i bin makim na pikim yumi na pasim yumi long Krai o nogat? Hau na bai yumi save, God i bin makim na pikim yumi na putim yumi insait long dispela nupela komyuniti bilong Em o nogat?

Long Efesus 1:13 yumi bin skelim dispela toktok. Lukim gen **lain 13** na yumi holim tingting. Long **lain 13** Pol i tok olsem, *“Na yupela tu i pas long ol dispela samting bilong Krai taim yupela i harim tok i tru tumas. Dispela tok i tru tumas em i gutnius i tokaut long wok God i mekim long Krai bilong sevim yupela.”*

Olsem na, yumi ken i klia olsem, manmeri God i bin makim na pikim na pasim long Krai, ol bai harim trupela gutnius bilong God. Na tu, ol bai save olsem dispela trupela gutnius bilong God em i trupela gutnius bilong God.

Na Pol i skruim dispela tok na em i tok long **lain 13** olsem, *“Na taim yupela bilip...”* Yu save, manmeri God i bin makim na pikim na pasim long Krai, ol bai harim trupela gutnius bilong God, na ol bai save olsem dispela gutnius em i tru tumas, na ***ol bai bilipim dispela trupela gutnius bilong God.***

Ol i no inap harim na bilipim na trastim na bihainim ol giaman gutnius ol sampela man i save autim. Nogat tru! Ol bai bilipim na trastim na lavim na bihainim ***trupela*** gutnius bilong God tasol.

Orait, tasol Pol i tokaut long narapela samting long **lain 13**. Em i tok, *“Na taim yupela bilip God i givim wanpela mak long yupela bilong soim olsem Em i bin pasim yupela long Krai. Na dispela mak em i Holi Spirit God i bin promisim.”*

Olsem na, yu tingim. Long wanem as yu bin harim trupela tok bilong God? Na long wanem as yu save olsem dispela trupela tok bilong God i tru tumas? Na long wanem as yu tanim bel na bilipim na trastim na bihainim dispela trupela gutnius i tokaut long faitful wok bilong Jisas?

Yu bin harim na bilipim bikos God i bin givim Holi Spirit long yu na Em i stap insait long yu. Yu save, ol dispela samting em i **hanmak** bilong Holi Spirit. Jisas i bin tok long **Jon 16:13** olsem, “.....*taim Spirit bilong tok tru olgeta Em i kam, bai Em i stiaim yupela i go long olgeta tok i tru.*”

Yu save? Em i Holi Spirit i bin stiaim tingting bilong yupela i go long olgeta trupela gutnius bilong God. Em i Holi Spirit i bin opim bel bilong yupela na yupela bilipim na trastim na bihainim trupela gutnius bilong God. Ol dispela em i **hanmak** bilong Holi Spirit. Em i Holi Spirit i bin senisim yupela i tanim bel na i bilipim na trastim na bihainim trupela gutnius bilong God.

Ol dispela **hanmak** bilong Holi Spirit i soim olsem, Holi Spirit i stap insait long yu. Na dispela i soim yu olsem, God i bin makim na pikim na pasim yu long Krai. Taim yu lukim ol dispela **hanmak** bilong Holi Spirit long laip bilong yu, orait yu ken i save olsem, Holi Spirit i stap insait long yu, na dispela i soim yu olsem, God i bin makim na pikim na pasim yu long Krai.

Na dispela em i gutpela tru. Tasol aposel Pol i skruim dispela tok i go yet long **lain 14**. Na em i tok olsem, “*Holi Spirit i olsem **diposit** bilong olgeta samting Krai i bin kisim bilong yumi na bihain yumi bai lukim.*”

Orait, nau yumi save long tupela samting bilong Holi Spirit God i bin promisim. Fes samting i olsem....

God i givim Holi Spirit long yumi na Holi Spirit i stap insait long yumi bilong soim yumi olsem,
God i bin makim na pikim yumi na pasim yumi long Krai.

Na sekon samting i olsem....

Holi Spirit Em i *diposit* bilong olgeta samting Krai i kisim pinis bilong yumi na bihain yumi bai lukim.

Na **diposit** em i wanem samting? Mi tok piksa pastaim.....

Yu save long pasin bilong baim meri. Taim yupela makim wanpela meri na yupela laik baim, orait yupela bai toktok wantaim papa bilong dispela meri na yupela bai pasim toktok long pe bilong em.

Em olsem na, sapos yupela makim pe olsem K1,500, orait papa bilong meri bai tok olsem, “Yupela putim diposit pastaim na long dispela wei mi ken i save olsem yupela no giaman.” Olsem na, yupela bai putim K200 or K300 diposit na olgeta manmeri i ken i save olsem, yupela baim pinis dispela meri, na papa i no ken i givim dispela meri i go long narapela lain. Yu save, taim yupela putim diposit long baim meri, em olsem yupela baim dispela meri pinis. Na ol lain bilong meri i ken i save olsem, yupela

no giaman long baim meri, na ol i ken i save olsem, bai yupela pinisim dispela pe long bihain long sampela taim.

Na wankain olsem, Holi Spirit Em i *diposit*. Taim God i givim Holi Spirit long yumi, i olsem God i tok, “Hap mi putim nau na bihain bai yupela kisim olgeta blesim bilong heven.” Holi Spirit Em i diposit bilong olgeta samting Krai i bin kisim bilong yumi na bihain yumi bai lukim.

Krai, long dai bilong Em, Em i bin kisim olgeta blesim bilong heven – Em i kisim ol dispela samting bilong givim yumi, tasol yumi no kisim yet. Em olsem tasol God i givim wanpela blesim long yumi **nau**, Em i dipositim wanpela blesim long yumi **nau** bilong soim yumi olsem, olgeta blesim bilong heven em bilong yumi. God i givim Holi Spirit long yumi **nau**, olsem diposit, bai yumi ken i klia olsem, olgeta blesim bilong heven em bilong yumi na bai yumi lukim na kisim.

Olsem na, taim yumi lukim hanmak long Holi Spirit long laip bilong yumi, orait yumi ken i save olsem, dispela em i diposit, na bihain bai yumi lukim na kisim olgeta blesim bilong heven.

Na mi save olsem, sampela taim ol man bai kisim bek diposit ol i putim bilong baim meri o ol lain bilong meri i salim diposit i go bek gen bikos ol i senisim tingting bilong ol na ol i no laik ol i baim meri pikinini bilong ol.

Tasol, Pol i tok long **lain 14** olsem, “*....Holi Spirit bai i stap wantaim yumi manmeri bilong God inap long taim God i kisim bek yumi na yumi stap fri wantaim Em.*”

Harim. God i no inap kisim bek diposit bilong Em. Nogat tru. God i no inap rausim Holi Spirit long yumi. Nogat tru. God i no inap rivesim ol samting Em i bin mekim long yumi. Nogat tru. God i givim Holi Spirit long yumi bikos Em i bin makim na pikim na pasim yumi long Krai long taim pinis. Holi Spirit Em i diposit bilong olgeta samting God i bin mekim long yumi na redim bilong yumi. Olsem na, Holi Spirit i no inap lusim yumi. Em bai stap i go i go i go inap long taim God i bin makim bilong kisim yumi na putim yumi long ples bilong Em.

Sapos yu lukim hanmak bilong Holi Spirit long laip bilong yu, orait yu mas klia olsem, God i bin givim diposit long yu bilong soim yu olsem, yu bilong God na bai yu kisim olgeta samting Krai i bin kisim bilong yu.

Sampela manmeri i save sutim tok long yumi, na ol i tok olsem, “Yupela manmeri i lusim bikpela misin na yupela bihainim tok Waitman i autim, bai yupela lus long hel.” Na sampela manmeri i tok olsem, “Yupela manmeri i lotu aninit long diwai, orait yupela lain bilong Seten tasol.” Yu save, planti manmeri i makim yumi na tok, “Yupela Seten lain tasol.” Na sampela taim dispela kain toktok i ken i pretim yumi, a?

Tasol, yu tingim. Sapos yu harim trupela Gutnius bilong God na yu save olsem, dispela gutnius em i trupela gutnius, na yupela bilipim na trastim na lavim na bihainim dispela trupela gutnius, orait yupela mas save olsem, dispela em i hanmak bilong Holi Spirit tasol. Em i no hanmak bilong Seten.

Nogat. Em i hanmak bilong Holi Spirit. Dispela i soim yu olsem, God i bin givim Holi Spirit long yu na Holi Spirit Em i diposit bilong olgeta blesim bilong heven. Olsem na, yupela no ken i pret long toktok bilong ol manmeri. Ol i no save.

Na sampela manmeri i save tok olsem, “Yupela no stap long trupela misin. Yupela lus lain tasol.” Tasol, hau na bai mipela lus? Sapos yumi lukim hanmak bilong Holi Spirit long laip bilong yumi, orait hau na bai yumi lus? Yumi no inap bikos God i givim Holi Spirit long yumi bilong soim yumi olsem, God i bin makim na pikim na pasim yumi long Krai long taim pinis. Holi Spirit Em i diposit bilong olgeta blesim Krai i kisim bilong yumi na bai yumi lukim.

Harim. Yumi no ken i harim tok ol manmeri i mekim. Nogat. Yumi no ken i harim tok ol sampela manmeri bilong sampela misin i mekim. Nogat. Yumi mas harim tok **God** i mekim. Yumi mas luksave long hanmak bilong Holi Spirit long laip bilong yumi na yumi mas trastim tok God i mekim long dispela samting. Sapos yu harim na bilipim na trastim na bihainim trupela gutnius bilong God, orait dispela em i hanmak bilong Holi Spirit na dispela i soim yumi olsem God i bin pasim yumi long Krai. Dispela em i diposit bilong olgeta blesim God i givim yumi i bilong Krai.

Sampela manmeri i save amamas na pas long lotu na ol i bisi long bihainim lotu pasin na bihainim ol wanwik bung na ol dispela kain samting. Tasol, long bihain, ol i les na lusim lotu gen na i stap nating. Na sampela taim yumi pret long dispela kain pasin na yumi tingim olsem, “Bihain, bai mi tu mi givap na lusim dispela gutpela gutnius bilong God o nogat?”

Harim. Ol trupela lain bilong God i no inap givap na lusim olsem ol sampela lotu manmeri i save mekim. Nogat tru. Holi Spirit bai stap wantaim ol manmeri bilong God i go i go i go olgeta na bai ol i lukim olgeta blesim bilong God. Manmeri we Holi Spirit i bin opim ai na ia na bel bilong ol na ol i bilipim na trastim trupela gutnius bilong God, ol i no inap lusim na i stap nating. Nogat. Ol bai i stap na bihainim dispela gutnius i go i go i go olgeta bikos Holi Spirit i stap wantaim ol na Holi Spirit i no inap lusim ol. Holi Spirit Em i diposit bilong soim yumi olsem, God bai holim yumi i go i go i go inap long taim Em i kisim yumi i go long ples bilong Em.

(Yu yet, long haus bilong yu, yu ken i lukim tok bilong God i stap long **Rom 8:18-27**. Dispela tok i sapatim toktok i stap long **Efesus 1:13-14**.)

Holi Spirit Em i diposit bilong olgeta samting yumi bai i stap long em long bihain. Holi Spirit Em i wanpela gutpela blesim nau bikos Em i bin kamapim trupela bilip long yumi, na Em i save opim ai na ia na bel bilong yumi na nau yumi save olsem, yumi bilong God na bai yumi lukim olgeta samting bilong heven.

Long dispela as yumi save amamas tru. Ol sampela lotu i save mekim giaman amamas bikos ol i amamas long paitim gita na ol i amamas long haus lotu bilong ol na ol i amamas long ol kain samting olsem. Tasol yumi amamas bikos Holi Spirit i wok insait long yumi na Em i kamapim samting yumi no fit long kamapim – em i kamapim trupela bilip long yumi. Yumi amamas bikos God i givim diposit

long yumi pinis bilong soim yumi olsem, Em i bin sevim yumi na olgeta blesim bilong heven em bilong yumi.

Las tok Pol i mekim long **Efesus 1:14** i olsem, *“God i mekim ol dispela samting bilong apim nem bilong Em i bikpela na gutpela tumas.”* Ol dispela samting God i tokaut long em long lain 1 i kam daun long lain 14, ol dispela samting God i mekim bilong apim nem bilong Em i bikpela na gutpela tumas. Yumi God i bin makim na pikim na pasim long Krai, yumi save pinis God Em i bikpela na gutpela tumas. Olsem na, yumi tasol i ken i amamas tru na litimapim tru nem bilong God.

Olsem na, las toktok mi laik mekim long yupela nau dispela moning i olsem.....

Amamas long God tasol na litimapim nem bilong God na nem bilong Jisas Krai.

Em tasol.

Rom 8:18-27

¹⁸ *Taim mi tingting long glori God bai soim yumi long bihain, mi save tingim olsem ol hevi nau yumi save pilim em i liklik samting tumas.* ¹⁹ *God i bin wokim ol samting antap na Em i wokim dispela graun, na ol dispela samting i strong long wetim taim we ol pikinini bilong God i kamap ples klia.* ²⁰⁻²¹ *Ol samting antap na ol samting bilong dispela graun ol tu i save pilim hevi bilong sin. Ol i no mekim wanpela rong na kisim dispela hevi. Nogat. God i putim ol dispela samting insait long hevi bilong sin. Tasol ol dispela samting i no inap i stap olsem i go i go. Nogat. Bihain, ol dispela samting bai fri long hevi bilong sin na dai, na ol bai kam insait long glori bilong God wantaim ol pikinini bilong God.* ²² *Yumi save ol samting bilong antap na ol samting bilong dispela graun i pilim hevi kain olsem meri i pilim hevi taim em i laik karim pikinini. Na ol i pilim dispela hevi i kam i kam long nau.* ²³ *Em i no dispela samting tasol i pilim hevi i go i go. Nogat. Yumi we Holi Spirit i karim sampela kaikai pinis long laip bilong yumi, yumi tu i pilim olsem. Em olsem na yumi save pilim hevi bilong sin na yumi strong long wetim taim we God bai kamapim nupela bodi bilong yumi. Na taim bodi bilong yumi i kamap nupela, em nau yumi kamap pikinini bilong God olgeta.* ²⁴ *Taim God i kisim bek yumi, yumi bin tingting strong long dispela samting God i laik mekim long bihain. Yumi no kisim yet, olsem na yumi tingting strong long ol dispela samting.* ²⁵ *Tasol sapos yumi no kisim yet, orait yumi mas bel isi i stap na wetim ol dispela samting yumi tingting strong long kisim.*

²⁶ *Na tu, Holi Spirit i save helpim yumi. Yumi no gat strong, tasol Em i save helpim. Taim yumi laik prea yumi bai askim God long wanem samting? Yumi no save gut. Tasol Holi Spirit i pilim tru ol hevi bilong yumi, na dispela i dip tumas na i winim toktok, na Em i save karim hevi bilong yumi i go long God.* ²⁷ *God Em i klia long olgeta tingting bilong yumi na Em i klia long tingting bilong Holi Spirit. Olgeta taim Holi Spirit i save bihainim laik bilong God. Olsem na, taim Em i wok long askim God long helpim yumi, orait olgeta askim bilong Em i pas tru long laik bilong God.*